

IX თავი

მობილობა ბსუ-ში, შიდა მობილობა და საერთაშორისო მობილობა (განახლებული რედაქცია - სექტემბერი, 2023 წ.)

სტუდენტის ერთი უმაღლესი საგანმანათლებლო დაწესებულებიდან სხვა დაწესებულებაში გადასვლის (შემდგომში – მობილობა), ასევე ერთი საგანმანათლებლო პროგრამიდან სხვა საგანმანათლებლო პროგრამაზე (შემდგომში – შიდა მობილობა) გადასვლის პროცედურას განსაზღვრავს საქართველოს განათლებისა და მეცნიერების მინისტრის 2010 წლის 4 თებერვლის №10/5 ბრძანებით დამტკიცებული „უმაღლესი საგანმანათლებლო დაწესებულებიდან სხვა უმაღლეს საგანმანათლებლო დაწესებულებაში გადასვლის წესი.“

ბსუ-ში მობილობის (შიდა მობილობის) პროცედურები ხორციელდება საქართველოს კანონმდებლობისა და ბსუ-ს რექტორის 2023 წლის 01 აგვისტოს N01-02/143 ბრძანებით დამტკიცებული „ბსუ-ში მობილობის (შიდა მობილობის) ადმინისტრირების წესის“ შესაბამისად (წინამდებარე გზამკვლევის დანართი N9).

სტუდენტთა მობილობის პროცესის ადმინისტრირებას ახორციელებს საჯარო სამართლის იურიდიული პირი – განათლების მართვის საინფორმაციო სისტემა (შემდგომში – მართვის სისტემა). სტუდენტთა მობილობის პროცესის ადმინისტრირებისათვის იქმნება **მობილობის ელექტრონული პორტალი** (შემდგომში – ელექტრონული პორტალი).

სტუდენტთა მობილობის პროცესის ადმინისტრირებისათვის დგინდება მობილობის მსურველ პირთა ელექტრონულ პორტალზე რეგისტრაციის ვადა.

სხვა უმაღლესი სასწავლებლებიდან ბსუ-ში მობილობის მსურველი სტუდენტი ვალდებულია სსიპ - განათლების მართვის საინფორმაციო სისტემის ელექტრონულ პორტალზე (www.students.emis.ge) გაიაროს რეგისტრაცია და გადაიხადოს მობილობის საფასური (40 ლარი).

სტუდენტებმა, რომელთაც მოიპოვეს მობილობის წესით ბსუ-ს საგანმანათლებლო პროგრამებზე ჩარიცხვის უფლება, ბსუ-ს რექტორის ბრძანებით დადგენილ ვადებში უნდა წარმოადგინოს:

- ა) განცხადება (ნომში განთავსდება ბსუ-ს ვებგვერდზე);
- ბ) პირადობის დამადასტურებელი მოწმობის ასლი;
- გ) სრული ზოგადი განათლების მიღების დამადასტურებელი დოკუმენტის ასლი;
- დ) საგანმანათლებლო დაწესებულებაში ჩარიცხვის ბრძანებისა და სტუდენტის სტატუსის განმსაზღვრელი ყველა სამართლებრივი აქტის დამოწმებული ასლი;
- ე) სასწავლო ბარათის დამოწმებული ასლი/ ცნობა სტუდენტის მიერ ათვისებული კრედიტების შესახებ;
- ვ) წვევამდელის სამხედრო-სააღრიცხვო მოწმობის ასლი (ან სამხედრო ბილეთი, ასეთის არსებობის შემთხვევაში);

- ზ) უცხო ქვეყანაში მიღებული განათლების აღიარების დამადასტურებელი დოკუმენტის ასლი (ასეთის არსებობის შემთხვევაში);
- თ) პროგრამის თავსებადობის (კრედიტების აღიარების) დასკვნაზე მობილობის მსურველის თანხმობის ან უარყოფის შესახებ განცხადება (აღიარების დასკვნის გაცნობის შემდეგ, ბსუ-ს რექტორის ბრძანებით დადგენილ ვადაში და წესით);
- ი) სადოქტორო ხელმძღვანელის თანხმობა (შესაძლებელია მოთხოვნილი იქნეს დოქტორანტებისათვის);
- კ) სავარაუდო სამეცნიერო ხელმძღვანელის თანხმობა (შესაძლებელია მოთხოვნილი იქნეს დოქტორანტებისათვის).

მობილობის მსურველის ცოდნისა და უნარების საგანმანათლებლო პროგრამასთან თავსებადობის დადგენის მიზნით ფაკულტეტი უფლებამოსილია ფაკულტეტის საბჭოს გადაწყვეტილებით განსაზღვროს პროგრამაზე მიღების წინაპირობა ან/და მობილობის მსურველს ჩაუტაროს გასაუბრება/გამოცდა.

შესაბამისი ფაკულტეტის ხარისხის უზრუნველყოფის სამსახურის კოორდინირებით მზადდება კრედიტების აღიარების დასკვნები და ფაკულტეტის დეკანის სამსახურებრივი ბარათი ელექტრონული საქმისწარმოების (eflow.emis.ge) საშუალებით გადაეცემა ბსუ-ს ხარისხის უზრუნველყოფის სამსახურს და ბსუ-ს სასწავლო პროცესის დეპარტამენტს.

კრედიტების აღიარების დასკვნების მობილობის მსურველთათვის გაცნობის და კრედიტების აღიარების დასკვნაზე მათი თანხმობის/უარყოფის განცხადების მიღების ორგანიზებას უზრუნველყოფს ბსუ-ს სასწავლო პროცესის დეპარტამენტი.

სასწავლო პროცესის დეპარტამენტი უმაღლესი განათლების მართვის საინფორმაციო სისტემაში ასახავს სტუდენტის ჩარიცხვის სამართლებრივი აქტის პროექტს და მასთან დაკავშირებულ ინფორმაციას.

მობილობის წესით სტუდენტების ბსუ-ში ჩარიცხვის შესახებ რექტორის ბრძანების პროექტზე მართვის სისტემის დადებითი დასკვნის მიღების შემდეგ გამოიცემა ბსუ-ს რექტორის ბრძანება სტუდენტის მობილობით ჩარიცხვის შესახებ (1 ოქტომბრამდე შემოდგომის ან 1 მარტამდე გაზაფხულის სემესტრში) და გამოცემიდან 2 სამუშაო დღის ვადაში აისახება უმაღლესი განათლების მართვის საინფორმაციო სისტემაში.

შიდა მობილობა (საგანმანათლებლო პროგრამის შეცვლა)

ბსუ-ში შიდა მობილობა წელიწადში ორჯერ ცხადდება, **სასწავლო წლის შემოდგომის და გაზაფხულის სემესტრებისათვის.**

ბსუ-ში შესაძლებელია გამოცხადდეს **რიგგარეშე შიდა მობილობა**, ბსუ-ს საგანმანათლებლო პროგრამის აკრედიტაციაზე უარის თქმის ან აკრედიტაციის გაუქმების შემთხვევაში ან ბსუ-ს მიერ საგანმანათლებლო პროგრამის გაუქმების შემთხვევაში.

შიდა მობილობის ფარგლებში ბსუ-ს სტუდენტს (მათ შორის ბსუ-ს სტატუსშეჩერებულ პირს) საშუალება აქვს გადავიდეს ბსუ-ს სხვა საგანმანათლებლო პროგრამაზე (იმავე ან ბსუ-ს სხვა ფაკულტეტზე).

შიდა მობილობაში მონაწილეობის უფლება სტუდენტს წარმოეშობა უმაღლესი განათლების შესაბამის საფეხურზე სწავლების ერთი სემესტრის შემდეგ, **გარდა რიგგარეშე შიდა მობილობაში მონაწილე სტუდენტებისა.** სწავლების პერიოდში არ შედის ის დრო, რომლის განმავლობაში პირს შეჩერებული ჰქონდა სტუდენტის სტატუსი.

ბსუ-ში შიდა მობილობის/აღდგენის მსურველი/სტატუსშეჩერებული სტუდენტი ვალდებულია რექტორის ბრძანებით დადგენილ ვადებში და წესით წარმოადგინოს შიდა მობილობის განაცხადი ელექტრონულად, ბსუ-ს სტუდენტური პორტალის - portal.bsu.edu.ge „შიდა მობილობის“ მოდულის საშუალებით. სტუდენტი უფლებამოსილია აირჩიოს არაუმეტეს 3 საგანმანათლებლო პროგრამისა და განსაზღვროს არჩეული საგანმანათლებლო პროგრამების პრიორიტეტულობა (რიგითობის შესაბამისად).

შიდა მობილობის/აღდგენის მსურველი სტუდენტი/სტატუსშეჩერებული სტუდენტის:

- ა) ელექტრონული განაცხადის ტექნიკურ გადამოწმებას და დადასტურებას ახდენს სასწავლო პროცესის მართვის დეპარტამენტის შესაბამისი პასუხისმგებელი პირი;
- ბ) ერთიანი ეროვნული გამოცდების/სამაგისტრო გამოცდების შედეგების შეთავაზებულ პროგრამასთან თავსებადობას ამოწმებს და ადასტურებს ფაკულტეტის დეკანი ან დეკანის ბრძანებით განსაზღვრული პასუხისმგებელი პირი;
- გ) ფაკულტეტის საბჭოს გადაწყვეტილებით განსაზღვრულ წინაპირობებთან თავსებადობას ამოწმებს და ადასტურებს ფაკულტეტის დეკანი ან დეკანის ბრძანებით განსაზღვრული პასუხისმგებელი პირი;

საგანმანათლებლო პროგრამაზე ჩარიცხვის უფლებამოსილებული პირების განცხადებებს განიხილავს შესაბამისი ფაკულტეტი, რომელიც ამავე ფაკულტეტის ხარისხის უზრუნველყოფის სამსახურთან შეთანხმებით ადგენს შიდა მობილობის მსურველის მიერ საგანმანათლებლო პროგრამის ფარგლებში მიღწეული სწავლის შედეგების შეთავაზებულ საგანმანათლებლო პროგრამასთან **თავსებადობისა და კრედიტების აღიარების დასკვნას.**

ფაკულტეტის ხარისხის უზრუნველყოფის სამსახურის ხელმძღვანელობით მომზადებული კრედიტების აღიარების დასკვნის ელექტრონული ვერსია (ხელმოწერილი და სკანირებული) აიტვირთება ბსუ-ს პორტალის „შიდა მობილობის“ მოდულის შესაბამის ველში, შიდა მსურველმა ბსუ-ს სტუდენტმა/სტატუსშეჩერებულმა სტუდენტმა, კრედიტების აღიარების დასკვნის გაცნობის შემდეგ, ბსუ-ს რექტორის ბრძანებით განსაზღვრულ ვადაში და წესით, ბსუ-ს სტუდენტური პორტალის შიდა მობილობის მოდულის საშუალებით უნდა დააფიქსიროს ელექტრონულად **თანხმობა ან უარყოფა** კრედიტების აღიარების დასკვნაზე.

შიდა მობილობის (პროგრამის შეცვლის) მსურველი მოიპოვებს შესაბამის საგანმანათლებლო პროგრამაზე შიდა მობილობით ჩარიცხვის უფლებას, მის მიერ ბსუ-ს სტუდენტურ პორტალზე „შიდა მობილობის“ მოდულის მეშვეობით რეგისტრირებული (არჩეული) პრიორიტეტული პროგრამის მიხედვით, თუკი კრედიტების აღიარების დასკვნაზე სტუდენტი დადგენილ ვადაში ელექტრონულად დააფიქსირებს თანხმობას.

ბსუ-ს სასწავლო პროცესის დეპარტამენტი, შესაბამის ფაკულტეტთან კოორდინირებულად, რექტორის ბრძანებით დადგენილ ვადებში, უზრუნველყოფს შიდა მობილობის ფარგლებში პროგრამის შეცვლის მსურველებთან ხელშეკრულებების გაფორმებას.

სასწავლო პროცესის დეპარტამენტი, ბსუ-ს ხარისხის უზრუნველყოფის სამსახურთან შეთანხმებით, ორგანიზებას უწევს შიდა მობილობის წესით სტუდენტების ბსუ-ში ჩარიცხვის შესახებ რექტორის ბრძანების პროექტის მომზადებას.

თუკი შიდა მობილობის (პროგრამის შეცვლის) მსურველთა განცხადებების რაოდენობა, რომლებიც აკმაყოფილებენ საგანმანათლებლო პროგრამაზე მიღების წინაპირობას (ასეთის არსებობის შემთხვევაში), აღემატება პროგრამაზე შიდა მობილობით მისაღები ვაკანტური ადგილების რაოდენობას, მაშინ შიდა მობილობით შესაბამის პროგრამაზე ჩარიცხვის უფლებას მოიპოვებს სტუდენტი საკონკურსო ქულის შესაბამისად, რომელიც ითვალისწინებს როგორც ერთიანი ეროვნული გამოცდების შედეგებს (გარდა ერთიანი ეროვნული გამოცდების გარეშე ჩარიცხული პირების შემთხვევისა), ისე ბსუ-ში სწავლის პერიოდში მიღებულ შეფასებებს.

სწავლის საფასურის დავალიანების მქონე პირის შიდა მობილობის შედეგად შესაბამის პროგრამაზე ჩარიცხვა (საგანმანათლებლო პროგრამის შეცვლა ან იმავე საგანმანათლებლო პროგრამის სასწავლო პროცესში დაბრუნება/სტუდენტის სტატუსის გააქტიურება) შეიძლება მხოლოდ იმ შემთხვევაში, თუკი რექტორის ბრძანების გამოცემის თარიღისათვის მას დაფარული ექნება სწავლის საფასურის დავალიანება (სასწავლო პროცესის დეპარტამენტი აღნიშნულ ინფორმაციას გამოითხოვს ბსუ-ს საფინანსო-ეკონომიკური დეპარტამენტიდან).

საერთაშორისო მობილობა

ბსუ-ს სტუდენტის საერთაშორისო მობილობაში მონაწილეობის წესი განისაზღვრება ბსუ-ს აკადემიური საბჭოს 2015 წლის 08 ოქტომბრის N111 დადგენილებით დამტკიცებული „სასწავლო პროცესის მარეგულირებელი წესით“ (წინამდებარე გზამკვლევის დანართი 2), „საერთაშორისო გაცვლითი პროგრამების ადმინისტრირების წესით“ (წინამდებარე გზამკვლევის დანართი N32).

ინფორმაცია გაცვლითი პროგრამების შესახებ ვრცელდება ბსუ-ს ვებგვერდისა და ბსუ-ს პორტალის (portal.bsu.edu.ge) მეშვეობით. ასევე ბსუ-ს სოციალურ ქსელში (FACEBOOK-გვერდზე) და უნივერსიტეტის საინფორმაციო დაფებზე და სტუდენტებთან საინფორმაციო შეხვედრებზე.

ბსუ-ს სტუდენტი უფლებამოსილია მონაწილეობა მიიღოს საერთაშორისო გაცვლით პროგრამაში (საერთაშორისო მობილობა) ბსუ-ს აკადემიური საბჭოს მიერ დამტკიცებული „საერთაშორისო გაცვლითი პროგრამების ადმინისტრირების წესისა“ და ბსუ-ს რექტორის შესაბამისი ბრძანების მოთხოვნათა დაცვით.

სტუდენტი ვალდებულია ბსუ-ს შესაბამისი ფაკულტეტის ხარისხის უზრუნველყოფის სამსახურის უფროსს შეუთანხმოს (ადასტურებს ხელმოწერით) სტუდენტსა და მიმღებ უნივერსიტეტს შორის გასაფორმებელი სასწავლო ხელშეკრულება (ე.წ. „Learning Agreement“).

საერთაშორისო მობილობის სემესტრის დაწყებამდე ბსუ-ს გაცვლითი საგანმანათლებლო პროგრამის მონაწილე სტუდენტი განცხადებით მიმართავს ბსუ-ს რექტორს და წარუდგენს

სასწავლო ხელშეკრულებას, მიმღები უნივერსიტეტის თანხმობის/მოწვევის წერილს. აღნიშნული განცხადების საფუძველზე შესაბამისი ფაკულტეტის დეკანის სამსახურებრივი ბარათის წარდგინებით გამოიცემა ბსუ-ს რექტორის ბრძანება სტუდენტის უცხო ქვეყანაში/უნივერსიტეტში გარკვეული ვადით სასწავლებლად გამგზავრების თაობაზე.

საერთაშორისო მობილობაში მონაწილეობის პერიოდში ბსუ-ს სტუდენტს არ უჩერდება სტუდენტის სტატუსი. ამ პერიოდში სტუდენტისათვის აკადემიური რეგისტრაცია გულისხმობს სასწავლო კურსებზე დარეგისტრირებას უცხო ქვეყნის პარტნიორ უმაღლეს საგანმანათლებლო დაწესებულებაში. საერთაშორისო მობილობის პერიოდში სტუდენტი სწავლას აგრძელებს მიმღები უნივერსიტეტის ქვეყნის კანონმდებლობით დადგენილი წესითა და ბსუ-სთან გაფორმებული ხელშეკრულებით (მემორანდუმით) განსაზღვრული პირობებით.

საერთაშორისო მობილობის პერიოდის აკადემიური რეგისტრაციის (სავალდებულო და არჩევითი სასწავლო კურსების რეგისტრაციის) შედეგები ბსუ-ს სასწავლო პროცესის მართვის ელექტრონულ სისტემაში აისახება სტუდენტის ბსუ-ს სასწავლო პროცესში დაბრუნების შემდეგ, სტუდენტის მიერ საერთაშორისო მობილობის პერიოდში ათვისებული სასწავლო კურსების (კრედიტების) აღიარებისა და ბსუ-ში სწავლის სემესტრის განსაზღვრის შესახებ ბსუ-ს რექტორის ბრძანების საფუძველზე.